



ADALBERTUS  
1875-1884  
BRUNNEN

585797-

-585808

Mag. St. Dr.

I





Christiani kisü ao gy. d. 20 Junii

.81V  
21



Ther  
6242

Sum. Ch. H.  
ad 1686. 7. 1713.



vide drcien; diff. 9. Pontificis de hac ma<sup>a</sup> a<sup>o</sup>, 670. editam p. 821.



*Wied. huc m. Dreieri Diss. 28. §. Pontificios. p. 877.*

DISPUTATIO THEOLOGICA

De

INVOCATIONE  
SANCTORUM  
CONTRA PONTIFICIOS,

*Quam*

Adistente divina gratia,

*Ex decreto & jussu Magnifici Dn. Rectoris & Amplis-  
simi Senatus Academici,*

*juxta statuta*

*Venerandæ Facultatis Theologicæ*

PRO LOCO

In Extraordinaria S.S. Theologiæ

Professione obtinendo,

*Publico eruditorum examini submittit*

JOHANNES LATERMANNVS,

S.S. Theol. Doctorandus.

RESPONDENTE

JACOBO BENKEZZER/

Hilperhusano Franco.

*Ad diem XVII. Januarij in Auditorio majori*

*horis ante & pomeridianis.*

---

REGIOMONTI,

EXCVDIT JOHANNES REUSNERUS

ANNO 1647.



SERENISSIMO ET POTENTISSIMO  
PRINCIPI AC DOMINO,

DOMINO

FRIDERICO  
WILHELMO,

MARCHIONI BRANDENBURGENSI,  
S.R.I. ARCHICAMERARIO ET ELECTORI,  
BORUSSIAE, JULIAE, CLIVIAE, MONTIUM, STE-  
TINI, POMERANIAE, CASSUBIORUM AC VAN-  
DALORUM, CROSNIAE ET JÄGERNDORF-  
FII IN SILESIA DUCI, BURGGRABIO NO-  
RINBERGENSI, PRINCIPI RUGIAE, COMI-  
TI MARCHIAE ET RAVENSBERGI,  
DOMINO IN RAVENSTEIN,

&c. &c.

DOMINO SUO CLEMENTISSIMO

*Exercitationem hanc praeliminarem in debita  
gratitudinis & devotae subjectionis  
signum*

humilimè offert

585803

I

JOHANNES LATERMANNVS,  
S. S. Theol. Doctorandus.



## COROLLARIA.

- I. Potestne homo ex propriis & naturalibus liberi arbitrij viribus se ad Deum convertere? N. contra Pelagianos.
- II. Potestne homo (NB.) ex propriis & nativis viribus suis gratiae Spiritus S. sive in conversione, sive post conversionem ulla ratione cooperari? N. contra Semi-Pelagianos & Synergistas.
- III. Potestne & debet homo, statim atq; Spiritus S. opus regenerationis inchoavit, eiq; vires ad conversionem necessarias ac sufficientes contulit, per collatam novam illam Spiritus S. virtutem cooperari? A. cum Formula Concordiae p. 674.
- IV. Paulus in IX. X. & XI. capitibus ad Romanos agitne ex professo, directe & principaliter de decreto electionis? N. contra Reformatos.
- V. Potestne fidelis absolute certus esse de perseverantia & futura salute sua? N. contra eosdem.
- VI. Num ille, qui per fidem se ad Deum convertit, de remissione peccatorum & gratia DEI potest & debet esse certissimus? A. contra Pontificios.
- VII. Num idem de sua in bono perseverantia & futura salute potest & debet esse certus ordinatè



natè siue conditionatè? A. cum orthodoxis.

VIII. Num bona opera necessaria sunt ad salutem efficiendam siue promerendam? N. contra Pontificios.

IX. Num studium virtutis & pietatis rectè dicitur conditio in omnibus requisita, qui salvi esse cupiunt, sine qua salus non datur? A. cum Meisnero, Gerhardo, aliisq. orthodoxis.

X. Num illud S. Bernhardi (de gr. & lib. arb.):  
Studium pietatis est VIA REGNI, NON  
CAUSA REGNANDI recto stat talo? A.

Hec cum in finem apposui, non ut de iis ex professo nunc disputetur, sed ut occasio mihi exhibeatur, perspicuè demonstrandi, disputationem meam De æterna DEI prædestinatione antehac habitam nihil quicquam prædictarum hæresium & errorum continere; sed ab iis prorsum & omnino immunem esse. Phrases item & modos loquendi, quos nonnulli durioribus & minus usitatis annumerârunt, & adhuc memoratis erroribus favere censent, tales non esse; sed alios, & præcipuos quidem, communem veterum juxta ac recentiorum Theologorum usum frequentari, alios classicis & optimæ notæ scriptoribus usurpatos esse, alios deniq. si non iisdem planè, similibus tamen verbis in Orthodoxorum scriptis reperiri. Quæ omnia interrogatus publice & ad oculum bono cum DEO cuilibet sum demonstraturus.



# DE INVOCATIONE SANCTORUM CONTRA PONTIFICIOS

## EXERCITATIO

in duas quæstiones distincta.

### QUÆSTIO I.

An Pontificij ob invocationem Sancto-  
rum idololatriæ jure meritoq; ac-  
cusentur?

**E**X quo vis aliqua mentis meæ se exerere cœ-  
pit, & de iis, quæ superiori seculo contige-  
runt, judicare potui, inter omnia, quæ DEUS  
per Reformationem Ecclesiæ præstitit be-  
neficia, illud semper primo loco collocavi,  
quòd religiosus, qui per preces exhibetur, cultus ad pristi-  
nam simplicitatem & integritatem per eam reductus est.  
Ut enim silentio nunc præteream cultū precum piis à pri-  
mordio mundi usitatum, omnes certè, qui novi fœderis  
temporibus primi Christo sacramentum dixerunt, quidq;  
proximis eos seculis sunt consecuti, nequaquam ad Ange-  
los, multò minùs autem ad sanctos vitâ functos; sed solum  
DEUM preces suas direxerunt. Præstò est quatuor Evange-  
listarum historia, in manibus omnium versatur actū Apo-  
stolicorum liber; nec desunt monumenta antiquissimo-  
rum Patrū, eaq; genuina, quæ id luculenter demonstrant.

II. Non est nostri instituti, fusè nunc ista persequi: ad  
alia n. properamus, consideraturi, num invocatio Sancto-  
rum, ut ab aliquot seculis in ecclesia Pontificia communi  
usu frequentata fuit, & adhuc hodiè frequentatur, idolola-  
triæ crimine contaminata sit? Adscribam, tamen unum ex  
antiquissimo scripto locū, qui nos abundè edocere potest,



l. 4. hist.  
c. 15.

veteres Christianos Sanctis, qui ex hac vita in aliam & beatiorē commigrarunt, hautquaquam adorationis seu religiosæ invocationis; sed mutuæ tantum dilectionis & fraternæ societatis cultum exhibuisse. *Hunc quidem, inquit Smyrnenſes apud Eusebium (Christum videlicet) tanquam Dei Filium adoramus, martyres verò tanquam discipulos & imitatores Domini dignè propter insuperabilem in Regem ipsorum ac Præceptorem benevolentiam diligimus, quorum & nos consortes & discipulos fieri optamus.* Hæc illi, quæ ex aurea Ecclesiæ Smyrnenſis epistola circulari depromſimus, quam Eusebius nobis conservavit & Chemnitius anno post natum Servatorem 160. scriptam esse existimat.

III. Subjicio ex eadem epistola oratiunculam S. Polycarpi, quam ille martyrio proximus & rogo jamjam impo-  
nendus ad sacro-sanctam & individuatam Trinitatem fudit. Verba illa habent: *Pater dilecti ac benedicti Filij tui Jesu Christi, per quem cognitionem tui accepimus, Deus Angelorum ac virtutum omnisq. creaturæ, & omnis generis justorum, qui vivunt coram te, tibi gratias ago, quòd hac me die & hora dignatus es, ut partem accipiam in numero martyrum, in populo Christi, ad resurrectionem vitæ æternæ, animæ simul & corporis, in incorruptione Spiritus S., in quibus suscipitur in conspectu tuo hodiè, in sacrificio pingvi & accepto, sicuti præparasti, jam antè patefecisti & adimplesti, qui mentiri nescis DEVS verax.* Quapropter & de omnibus te laudo, te benedico, te glorifico, per æternum Pontificem Jesum Christum Filium tuum dilectum, per quem tibi una cum ipso & Spiritu S. sit gloria nunc & in futuris seculorum seculis, Amen. Ita S. Polycarpus Apostolorum discipulus & ~~portans~~ nec Angelos nec sanctos demortuos; sed solum DEUM invocavit. Patrem etiam non per alium, quàm per æternum Pontificem J. C. Filium ejus dilectum laudavit & glorificavit.

IV. Coeterum lapsu temporum ut omnia in deterius  
ruere



ruere solent, ita quoq; cultus precum, quo praxis Christianorum maximam partem absolvitur, superstitionis opinionibus & cultibus haud parum corruptus fuit, donec tandem à seculis ad secula ad immodicam prorsus, quin planè idololatricā Sanctorū venerationem progressus factus est. Qui historicam narrationem videre desiderat, adeat antiquitatis ecclesiasticæ, quin omnis solidæ & accuratæ doctrinæ promptuarium, Chemnitium nostrum: ille n. historiam de origine & progressu invocationis Sanctorum ex præcipuis scriptoribus summâ diligentia contexuit. Idem in eo utilissimam ecclesiis nostris operam præstitit, dum preces quæ idololatriam partim sapiunt, partim manifestè continent, & à Pontificiis tum in publicis congressibus, tum aliàs usurpantur, collegit & omnium oculis exposuit. Ego lectorem eò nunc remitto, & sequentes tantum precatiunculas adscribo, quibus Pontificij B. Mariam virginem & alios sanctos hodieq; invocant:

*Exam.  
Conc.  
Trid.*

V. *Obsecro te, Domina, sancta Maria, Mater DEI, pietate plenissima, summi Regis Filia, mater gloriosissima, mater orphanorum, consolatio desolatorum, via errantium, salus omnium in te sperantium, virgo ante partum, virgo in partu, & virgo post partum: fons misericordiae, fons salutis & gratiae, fons consolationis & indulgentiae, fons pietatis & laetitiae, fons vitae & veniae, — peto, ut cum omnibus sanctis & electis DEI venias, & festines in auxilium & consilium meum, in omnibus orationibus & petitionibus meis, & in omnibus angustiis & necessitatibus meis. Et in omnibus illis rebus, in quibus ego sum aliquid facturus, locuturus aut cogitaturus omnibus diebus ac noctibus, horis atq; momentis vitae meae.*

Et iterum ad Mariam & Johannem: *Inclina Mater misericordiae aures tuæ pietatis indignis supplicationibus meis, & esto mihi miserrimo peccatori pia & propitia in omnibus auxiliatrix. O Johannes beatissime, Christi familiaris & amico — vo-*



bis duobus ego miserrimus peccator commendo hodiè corpus & animam meam. Et iterum ad Mariam: ô Maria, DEI genitrix & virgo gratiosa, omnium desolatorum ad te clamantium consolatrix vera, — me digneris juvare, ut perpetua damnationis sententiam per te, pia Mater & virgo, valeam evadere, & cum electis DEI omnibus ad aeterna gaudia feliciter pervenire. Et has preces ex libello depromimus, qui Parisiis Latino & Gallico idiomate excusus, & à Sorbonistarum collegio anno hujus seculi 26. approbatus est. Inscriptio ita habet: *HEURES PAR LE commandement du Roy, A Paris Chez Nicolas de la Vigne Prés la Porte S. Marcel.*

VI. Subijcio precationem, quæ vernaculâ lingvâ populo præscripta, & Coloniae in templo undecim mille virginum publicè in tabula proposita visitur: *O Brun der ewigen vnd hüfflischen Gnaden/ verlaß mich nicht / sondern nim mich vnter deinen Mantel deiner grundlosen Barmhertzigkeit / O vnser aller Leben/ O Hülferrin in aller Angst vnd Noth/ O Ursprung vnseres Heils/ O Anfang vnseres Lebens/ O Erlöserin des menschlichen Geschlechts/ O Veroenderin des natürlichen Lauffs/ O Erneuerin der menschlichen Natur / O Mittlerin zwischen Gott vnd Menschen/ O Hoffnung vnser Belohnung/ etc.*

Ibidem in quadam summi templi columna aræ tabulæ insculptum prostat:

*Vryshem Sancte meum fero Petre tibi comitatum,  
& mihi redde statum, te precor, atherium.*

VII. Sequuntur aliæ preces:

<i>O felix puerpera,</i>	<i>Nostra pians scelera,</i>
<i>Fure matris impera,</i>	<i>Redemptori.</i>
<i>Itē. Solve peccamina,</i>	<i>Relaxa crimina, Maria.</i>
<i>Restaura perditā,</i>	<i>Dimitte debita, Maria.</i>
<i>Nos à miseria,</i>	<i>Reduc ad gaudia, Maria.</i>

Item:



Item: <i>Ius precipit &amp; ratio,</i>	<i>Ergò ora suppliciter.</i>
<i>Ut mater præsint filio,</i>	<i>&amp; praece sublimiter.</i>
Item: <i>Maria Mater gratia,</i>	<i>tu nos ab hoste protege,</i>
<i>Mater misericordia,</i>	<i>&amp; horam mortis suscipe.</i>

Item: *Sub tuum praesidium confugimus sancta DEI genetrix: nostras deprecationes ne despicias in necessitatibus; sed à periculis cunctis libera nos semper virgo gloriosa & benedicta.*

Rursus: *Si sit multum, quod peccamus. Tui sumus, & speramus per te salvi fieri.*

VIII. Has & similes alias precandi formulas Pontificij etiamnum adhibent, quas non superstitiosas tantum, sed idololatrias esse, quilibet videt, & demonstrari facillime potest. Quaecunq; enim preces cultu soli Deo debitum, qui uno verbo *religiosus* dicitur, in creaturas transferunt, ab idololatriæ crimine non sunt immunes. Sed preces, quas attulimus, cultum religiosum creaturis tribuunt. Ab idololatriæ igitur crimine excusari non possunt. Quò proinde se contaminant, quotquot inter Pontificios preces illas in eo, quem simpliciter acceptæ in cujusvis intellectu gignunt, sensu ad sanctos fundunt. Sed illi (Pontificij) minorem allati argumenti propositionem inficiantur, quam nos ita confirmamus: Quibus precibus sancti ut donatores & largitores omnium beneficiorum tam animi, quam corporis, tam eorum, quæ in hac mortali vita nobis obtinent, quam quibus in altera vita coronabimur, invocantur, iis precantes quoad omnia sanctis sese submitunt, adeoq; religiosum eisdem cultum exhibent. Atqui precibus ejusmodi sancti ut donatores & largitores omnium beneficiorum tam animi, quam corporis, tam hujus, quam alterius vitæ invocantur. Ergò precibus istis orantes quoad omnia sanctis sese submitunt, adeoq; religiosum iisdem cultum exhibent.

IX. Eriste discursus in ipsa religiosa venerationis natu-



ra fundatur: ut n. omnis alius, ita divinus quoq; & religiosus cultus partim ab intellectu, partim à voluntate dependet, intellectus objecti colendi excellentiam, Deum videlicet, ut omnis boni fontem, autorem & largitorem cognoscit; voluntas a. in objectum ita cognitum fertur, & omni fiducia suâ in DEO recumbit. Solet præter intellectus & voluntatis munus (ut hoc obiter moneam) etiam exterior gestus addi, quando de veneratione agitur: sed ille ad ipsam cultus essentiam non pertinet. Unde iidem gestus (incurvatio corporis, genuflexio &c.) cultui religioso & non religioso communes sunt. Ne nunc de eo quicquam dicam, sine omnibus externis gestibus cultum sive honorem præstari posse. Notandum præterea, in inclinatione voluntatis, de qua diximus, sive in omnimoda illa, ut nonnulli vocant, subiectione, cultum religiosum, qui soli DEO debetur, vel maximè consistere.

X. Ex quibus omnibus manifestum est, illis, quas attulimus, & quæ eis similes sunt, aliis Pontificiorum precibus, cum omnimodam animi submissionem includant, divinum seu religiosum cultum Sanctis exhiberi. In quam sententiam M. Antonius de Dominis præclare ita scribit: *Oppositio (Protestantium) maxima meo iudicio (illa) est, quod invocatio Angelorum, sive Deipara virginis, sive aliorum Sanctorum, quorum anima sint cum DEO in cælis, in proximo periculo sit, ne fiat cum religioso cultu. Nam & plebem rudiorum religiosè sanctos invocare, & magis plurimos internè religioso affectu erga beatam virginem, aut aliquem Sanctum affici, quàm erga Christum, non est dubium. Neg. n. invocant Sanctum tanquam precatorem; sed tanquam principalem adiutorem. Neg. dicunt ora; sed adjuva, occurre, salva &c. Neg. aut exprimunt, aut mentè intelligunt, ut hæc fiant orando; sed ut ipsi sancti se ipsis immediatè hæc faciant; eosq; rogando plurimi virgini Mariae, & sanctis se totas, totam animam, totum spiritum,*  
*& in*

*L. VII. de  
Rep. eccl.  
c. XII.*



& in spiritualibus penitus subiiciunt, qua est idololatria quadam formata. Hactenus ingenua M. Antonij de Dominis confessio, qui alias in excusanda & extenuanda Sanctorum invocatione totus ibi est.

XI. Subjicio verba Georgij Cassandri, Theologi doctrinâ & singulari animi moderatione in Germania quondam clarissimi, qui eam ob causam ab invictissimis Imperatoribus Ferdinando I. & Maximiliano II. de conciliandis articulis inter nos & Pontificios controversis consultus & in aulam adscitus fuit. Verba, ad quæ respicio, ita habent: *Alter error est, quod homines etiam non mali certos sibi Sanctos, tanquam Patronos & tutores delegerunt, in eorum meritis atq; intercessione plus, quam in Christi merito fiduciam posuerunt, atq; adeo unico illo advectionis Christi officio obscurato Sanctos, atq; imprimis virginem Matrem, in illius locum substituerunt. Imò non defuerunt viri etiam celebres, qui assererent, id quod Hester Assuero promissit, se petenti, dimidium regni daturum, in Maria completum esse, in quam DEVS regni sui, quod iudicio & misericordia constat, dimidium, h. e. misericordiam transtulerit, alterâ regni parte sibi retentâ. Hinc illi tituli passim virgini tributi: Regina cæli, mater misericordie, vita, spes nostra, lux ecclesie, advocata & mediatrix. Quæ etsi commodam interpretationem admittant, ea tamen non semper omnibus, præsertim rudibus & imperitis occurrat. Quid quod totum psalterium, sublato ubiq; Domini nomine, in nomen Domine commutatum legitur? quin & edventum est, ut etiam Christus jam in cælo regnans, matri subiiciatur: quomodo in nonnullis ecclesiis canitur:*

*Ora matrem & jube Filio.*

Item: *O felix puerpera | Jure matris impera  
Nostrapians scelera, | Redemptori.*

XII. Hæc etiam fassus est Cassander, qui tamen in ecclesia

Consult.

de art.

Aug. conf.

art. 21.



clesia Pontificia perpetuò vixit. Insinuat equidem, erronea ista *commodam interpretationem* *admittere*; sed benè addit: *ea tamen non semper omnibus, præsertim rudioribus & imperitis occurrit.* Commoda, de qua loquitur, interpretatio, nisi me omnia fallunt, ista est, quòd B. Maria virgo eam ob causam mater misericordiæ, advocata & mediatrix meritò audire posse videatur, quoniam advocatum & mediatorem nostrum, qui fons misericordiæ est, peperit. Sed ne illud nunc urgeā, absurdā & longè petitam, nec rudibus & imperitis obviā esse interpretationē illam, ut Cassander ex parte lubens concedit: aliud certè & longè excellentius quid Mariæ tribuitur, quando cum Biele adseveratur, quòd DEUS dimidiam regni sui partem, misericordiam videlicet, in eam transfulerit, quando ea, quæ à Spiritu S. in toto Psalterio DEO O. M. aliàs tribuuntur, & ei soli competunt, Mariæ tanquam Dominæ transcribuntur, quando eidē imperium in filium, qui cum DEO Patre æquali potestate gaudet, ascribitur, quod postremum præ cæteris omnibus non impium saltem; sed absurdum insuper, quin planè ridiculum & ineptū est. Si enim mater Domini ne in nuptiis quidem Cananæis jure materno uti potuit, aut debuit, qui in negotio salutis possit? Et quis ignorat, aliàs etiam jus maternum in politica hautquaquam in omnibus valere? Nemo certè Principum, nemo eorum, qui regimini præsunt, consiliarios, nemo consulum matrem suam in gèrenda Rep. consulere tenetur.

XIII. Ista omnia igitur salvà DEI & Christi gloriā probari non possunt. Id quod moderatiores ex ipsis Pontificiis agnoscunt. Unde preces illas, quibus à Sanctis petitur, ut vitam æternam largiantur, istā expositione, ut notum est, juvare & emollire conantur: *Petre dona mihi vitam æternam, h. e. à DEO precibus tuis impetra, ut donet mihi vitam æternam.* Sed præterquam quòd interpretatio illa coacta est



est & maximè violenta (verba n. prout jacēt & sonant, accepta alium prorsus in intellectu cujusvis hominis sensum efficiunt,) ipsæ etiam preces illæ, quibus sancti vitæ functi, ut intercedant, implorantur, inutiles sunt & supervacaneæ, ut paulò pòst dicemus. Illud extra aleam controversiæ positum est, simplices formulis istis: *Petre dona mihi vitam eternam*, & similibus miserè seduci & idololatriæ laqueis irretiri.

XIV. Faxit Deus, ut Pontificij doctores aliquando magis in illis precandi formulis, quæ manifestā idololatriam continent, abrogandis, quàm emolliendis occupentur: quid n. juvat, aliquam in doctrina præ se ferre mutationem, si ipsa praxis & simpliciorum quidem, quæ communis est, præsentissimo periculo exposita, imò ipsi idololatriæ immerfa manet? Notanter de communi simpliciorum praxi potissimum loquor: qui n. inter eruditos pij sunt, prudentes, & cordati (qualis Georgius Cassander fuit) eos preces istas idololatricas aut planè non usurpare, aut in isto, quem virtus dictorū aliàs postulat, sensu non adhibere, faciliè credimus. Unde adeò imprudentes non sumus, ut omnibus Pontificiis sine discrimine idololatriæ crimē impingamus. De Georgio Cassandro, cujus jamjam mentionem faciebamus, Chemnitius memorat, quòd in colloquio quodam super invocatione sanctòrum instituto tandem post multas velitationes responderit: *Ego in meis precibus non soleo Sanctos invocare, sed invocationem dirigo ad Deum ipsum, idq; in nomine Christi, id n. tutius esse existimo.* Ita ille.

Exam.  
Conc.  
Trid.  
de ing.  
sanct.

XV. Còeterum si ipsa praxis apud Pontificios, simpliciorum imprimis, quæ, ut dixi, communis est, attendatur, dubium non est, plurimos religiosè Sanctos invocare, & magis interne religioso affectu erga beatam virginem aut aliquem Sanctum affici, quàm erga Christum, ut M. Antonius antea fatabatur, qui in ecclesia Pontificia natus & educatus est. Cassander, qui in eadem mortuus est, non diffitetur (ut itidem



suprà audivimus) quòd homines etiam non mali (h.e. simplices) certos sibi Sanctos, tanquam Patronos, & tutores delegerint, in eorum meritis atq; intercessione, plus quàm in Christi merito fiduciam posuerint, atq; adeò, unico illò advocatìonis Christi officìò obscuratò, Sanctos, atq; imprimis Virginem Mariam, in illius locum substituerint.

*L. c.* XVI. Pontificij fontico huic malo facilè medicinam adhibere possunt, si formulis precandi, quas verbum DEI præscribit, & primorum seculorum Christiani adhibuerunt, nobiscum utantur. *Illud libenter fateor, ait rectè Chemnitius noster, in Sequentiis, Hymnis & collectis, multas veras & pias sententias, eleganti & erudita brevitate comprehensas, contineri, quas meritò amamus, retinemus & usurpamus.* Illas Pontificij etiam ament, retineant & usurpent. Addit Chemnitius: *dolendum v. est, multa admixta esse, quæ verbo DEI non sunt consentanea; sed manifestam superstitionem redolent.* Ista iidem aboleant, & cultus precum pristina simplicitati & integritati suæ restitutus erit. Ante biennium canonem Missæ, quo Pontificii utuntur, in Germanicam linguam nostram translatum, & Colonia in gratiam plebis excusum vidi, eo scilicet fine, ut plebs preces, quas Sacerdos latino idiomate demurmurat, in vernacula lingua fundere possit. Canon iste maximam partem antiquus est, & multas piissimas veterum preces continet. Quòd si igitur ejusmodi libri in locum aliorum supersticiosorum & idololatricorum paulatim substituantur & in illis etiam, quæ superstitiosa fortè & verbo DEI minus consentanea sunt, expungantur, communis Pontificiorum praxis feliciter corrigi poterit.

## QUÆSTIO II.

Quid de precibus, quibus intercessio à Sanctis petitur, & veteres etiam usi sunt, statuendum?

*Can-*



I. *Camicijs Patrum*; ait Chemnitius, quem ut insignem antiquitatis ecclesiasticæ amatorem & æstimatorem sapius jam laudavimus, *reverenter tractanda est, salva tamen verbi DEI præ eminentiâ & fidei sinceritate*. Nos huic saluberrimo summi viri monito locum, ut par est, relinquemus, si prius exposuerimus, de quibus precibus deinceps acturi simus. Non lubet autem istas Pontificiorum preces hic pluribus examinare, quibus illi Sanctos adorant & religiosè invocant, dum eos, ut omnium & animi, & corporis, & fortunæ bonorum largitores implorant. Istius generis precandi formulæ ut superstitiosas & idololatricas jam antè rejecimus. Nec de illis precibus solliciti erimus, quæ non tantum intercessionem; sed merita quoq; Sanctorum comprehendunt, & adhuc hodiè à Pontificiis ad istum modum usurpantur: *Precibus & meritis B. Mariae semper-virginis & omnium Sanctorum perduc nos, Domine, ad regnum cælorum*. Ejusmodi orandi formulæ, quia gloriæ soli Servatori J. C. debitæ detrahunt, ejus meritum obscurant, & homines ab unico vero mediatore ad alios adulterinos abducunt, nullo pacto tolerari possunt aut debent. *Unus est mediator*, inquit Paulus, *Dei & hominum, homo Christus Jesus*. Et S. Johannes: *Si quis peccaverit, advocatum habemus apud Patrem J. C. justum, & ipse est propitiatio pro peccatis nostris*. Et iterum S. Paulus: *Per Christum habemus fiduciam & accessum in confidentia per fidem ipsius*. Hæc illi.

1. Tim. I.

1. Joh. II.

Eph. III.

II. Nos impræsentiarum, quid de precibus, quæ nudam intercessionis petitionem involvunt, sentiendum sit, videbimus. Exempla precum illarum fiunt, quando exempli causâ dicitur: *S. Petre ora pro me*. *S. Paule precibus tuis DEO salutem meam commenda*. Nuda hæc est, ut videmus, mortuorum sanctorum compellatio, ad eum modum instituta, ad quem sanctos adhuc superstites monemus & invitamus, ut precibus suis apud DEUM pro nobis intercedant. Quo



*Rom. XV. 30.* sensu Paulus ad Romanos scribit: *Obsecro vos Fratres per Dominum nostrum J. C. & per caritatem Spiritus S., ut adjuvetis me in orationibus pro me ad Deum.* Atq; de ista nuda compellatione principaliter inter nos & Pontificios non controvertitur, *de religiosa invocatione unicè inter nos & Pontificios questio est*, ait Gerhardus, ubi nudam illam compellationem religiosæ invocationi accuratè contradistingvit.

*Conf. cath.  
l. 2. part. 2.  
art. 10. c. 2.*

III. Discrimen illud ideò probè observandum est, ne idololatrias & sequiori ævo in ecclesiam invecas orandi formulas cum precibus veterū, quæ compellationem tantū sonant; confundamūs, & omnes sine discrimine idololatriæ incusemus & condemnemus. Seculū post natū Servatorē quartò compellatio mortuorū sanctorū jam tum cœpit, & postea propemodū universaliter in ecclesia recepta est, ut viri in antiquitate ecclesiastica versatissimi observant. Illas igitur veterum preces, quibus sancti in patria constituti invitantur, ut apud Deum pro iis, qui adhuc in via sunt, tantūmodò orent, ab idololatriæ labe immunes esse, haud illubenter concedimus: nihil aliud enim nisi humanum quid Sanctis tribuunt, siquidem, nudè orare pro altero, extra controversiam non divinum, sed humanum quid est.

IV. Cœterū ita canities Patrum, ut Chemnitius monuit, reverenter habenda est, ut salva tamen maneat verbi divini præminencia. Nequaquam igitur compellatorias (si ita appellare fas est) seu invitatorias, de quibus diximus, preces probamus; sed potius ob sequentes gravissimas causas improbamus. Primò, quoniam in Scriptura S. unica & perfectissima credendorū norma, precū ad beatos, qui jam in cœlis cum Christo sunt, directarū, nec vola, nec vestigiū ullum apparet. Illa ad solū Deum nos remittit: *Invoca me in die tribulationis, & eruam te, & honorificabis me.* Et istud non leve, ut Chemnitius præclare loquitur, sed maximi momenti argumentū est. Nullum enim dogma in ecclesia vel proponen-



*ponendum, vel recipiendum est, de quo nulla in Scriptura canonica extent certa, firma & perspicua testimonia.* Hæc ille.

V. Deinde ideò preces, quæ nudam compellationem continent, non adhibendas esse censemus, quia frustraneæ sunt & inutiles. Sancti enim etiam si ecclesiam militantem in statu calamitatibus & miseriis obnoxio versari in genere norint, singulorum tamen necessitates nequaquã cognitas habent atq; perspectas. Nec preces implorantium, quia absentes sunt, audiunt, aut ulla alia ratione cognoscunt. Cui adsertioni demonstrandæ multa Scripturæ dicta & argumenta Theologica suppeterent; sed nunc illud tantum urgebo, ipsos Pontificios tacitè fateri, se certum, quò nitantur, fundamentum non habere, dum alij ad peculiarem DEI revelationem, alij ad beatificam ejusdem visionem recurrere necessum habent. Neutrū autem stat firmo talo. Non prius: in verbo DEI enim, quod voluntatis divinæ indicium nobis facit, nullibi significatur, Deum sanctis in cælo existentibus preces in terris eos compellantiū revelaturum. Nec posterius: non sequitur enim; Qui Deū intuitivè cognoscit, in Deo omnia videt & cognoscit: nam angeli vident *faciem patris cælestis*, *Matth. XVIII. 10.* nec tamen cognoscunt tēpus, quod extremo judicio destinatum est. *De die illo*, inquit Servator, *nemo scit, ne quidem angeli cælorum.* Sancti igitur ideò frustra precibus compellantur, quia eas non cognoscunt. *Matth. 24. 36.*

VI. Præterea non frustraneæ tantum; sed superfluæ etiam sunt preces, de quibus disputamus. Beati enim eā erga nos caritate præditi sunt, ut, quoad statum rerū nostrarū cognitū habent, suā sponte precibus suis apud Deum pro nobis intercedant. Benè igitur Chemnitius: *De ipsa etiam compellatione*, inquit, *res plana est. Etiam si enim beati in cælo orent pro ecclesia, non tamen sequitur, ipsos in oratione nominatim à nobis esse compellandos. Nullum enim dubium est, fideles in Africa & India orare pro ecclesia; sed non sequitur, quando vel* *p. 308.*



Confess.  
Cathol.  
l. 2. Part.  
2. art. 10.  
c. 2. §. 6.

coram, vel per literas non possum cum ipsis agere, me eos in oratione debere compellare, ut pro mea necessitate orent. ita enim vel tribuere ipsis, quod desideria & gemitus cordis mei viderent, vel certè in oratione, quæ maximè religiosa esse debet, luderem. Hactenus Chemnitius. Ideò igitur precibus compellatoriis, ut eas suprà appellavimus, utendum non est, quia superflue sunt.

VII. Porro eam etiam ob causam vel maximè precatio-  
nes istas in ecclesiis nostris omittim9, quia periculosæ sunt,  
& nisi diligentissimè caveatur, ad superstitiosos cultus &  
manifestâ tandem idololatriâ viam muniunt, sicut id ipsum  
experientia luculentissimè attestatur. Videatur hac de re  
Chemnitius, qui fusè id persequitur & demonstrat. Ego  
verba Gerhardi nunc adscribo, quibus causas hactenus al-  
latas breviter ita complectitur. *Neg. questio est*, inquit (in-  
ter nos & Pontificios) *de nuda Sanctorum compellatione, quâ*  
*Sancti moneantur & invitentur, ut pro ecclesia in terris adhuc*  
*militante orent, quo modo à piis in his terris adhuc viventibus,*  
*vel corâ, vel per literas petimus, ut pro nobis apud Deum inter-*  
*cedant, preces suas nostris conjungant, iisdemq; salutē nostram*  
*DEO fideliter commendent.* Quamvis enim hanc defunctorum  
Sanctorum compellationē non simpliciter probemus, cum illi non  
amplius ut Sancti in his terris adhuc vivētes rebus nostris inter-  
sint, nec de tali defunctorū Sanctorū compellatione præceptum,  
vel promissio, vel probatū exemplū in Scripturis extet, cumq; pe-  
riculum subsit, ne ex tali compellatione absentium ad religiosam  
eorundem invocationem fiat progressus, tamen ex confessione &  
praxi Pontificiorū constat, quod tali Sanctorū compellatione non  
sint contenti: sed religiosè & suppliciter eosdē invocent, cultum  
adorationis ipsis tribuant, ad eorū non tantum intercessionē; sed  
etiam merita, opem & auxilium confugiant, spem & fiduciam  
cordis in ipsos collocent &c. Ista Gerhardus.

VIII. Malumus igitur nos Protestantes Catholici pre-  
catio-



cationes nostras ad Deum dirigere, ut Servator jussit, & viam nobis prævit. Malumus omnes alias, præter orationē dominicā, preces ad eum modū concipere, quem à Spiritu S. optimo preces formandi magistro, in Scripturis S. edocemur. Malumus etiā ævo Apostolico & primorū seculorū praxi nos conformare: illo n. tempore martyres h. e. testes illi Jesu magno numero vixerūt, quos ipse DEI Spiritus in Scriptura nobis commendat. Polycarpus, ut suprà vidimus, Deum Patrē nō per aliū, nisi *per aeternū Pontificem J. C. filiū ejus dilectū* laudavit & glorificavit. Et ista omnia certa sunt, & immotæ veritatis. Quæ a. seculo quarto & sequentibus de invocatione, seu cōpellatione Sanctorū paulatim irrepsērunt, omnia sunt incerta. *Cur igitur propter incerta (verba Chemnitij mea facio) ea, quæ certa sunt, relinquamus? aut quare certis incerta vel præferamus, vel certè misceamus? Cū invocatio maximè debeat religiosa esse, & certo ac firmo fundamento nitī?* Ita Chemnitius. Ad eundem modū Apologia A. C. loquitur, quæ inter symbolicos Ecclesiarū nostrarum libros proximū ab ipsa Aug. Conf. locum obtinet. Verba ita habent: *Adversarij non debebunt nos ad rem incertam cogere, quia oratio sine fide non est oratio.*

p. 295.

de invoc.  
Sanct.

IX. Deniq; quis inter ipsos paulō moderatiores Pontificios non ultrò fateatur, rectius à nobis dici: *Jesu Christe miserere nostri, & sanctissimis precibus tuis apud Deum Patrem pro nobis intercede*, quàm ab ipsis: *S. Petre ora pro nobis?* Georgius Cassander, ut suprà audivimus, à Sanctorū invocatione ideò abstinuit, quòd tutius esse existimavit, Deum ipsum in nomine Christi, quàm Sanctos compellare. Johannes Hoffmeisterus, postquam multas veterum de invocatione Sanctorū sententias attulisset, cum autore librorum *de visitatione infirmorū*, ita concludit: *Tutius & jucundius loquor ad meū Jesum, quàm ad aliquem sanctorū Spirituum DEI.* Ita Hoffmeisterus, qui unus ex numero Theologorum Pontificio-



ficiorum fuit, quorum censura de articulis A.C., cum illa primum oblata esset, requisita fuerunt, qui etiam præ cæteris animi moderatione claruit.

X. Finem facio & totam hanc de invocatione Sanctorum *danzeßer* claudio verbis Chemnitij, quibus ille historiolum quandā de Georgio Duce Saxoniae, ex Erasmo item nonnulla cognitu utilia & perquam jucunda, exponit: *Audiui ex Sacerdote, inquit, cum Georgius Dux Saxoniae in agone mortis constitutus esset, & Monachi certatim ipsum exhortarentur, alius, ut Mariam; alius, ut Angelos; alius, ut diversos Sanctos auxiliores invocaret, tandem nobilem quendam Ducis familiarem accessisse, & Ducem ita compellasse: Celsitudo Vestra in politicis negotiis semper usa fuit hoc proverbio: Rectè sine ambagibus progredi, esse viam maximè compendiarium. Quare igitur in hac via periculosissima celsitudo vestra tam varias ambages sectatur, & non potius invocatione sua rectè per Christum ad Deum ipsum, qui certò iuvare & vult & potest, accedit? Erasmus suo more jocatur, cum in naufragio quisq; ad suum sanctum, tanquam ad Deum tutelarem, invocatione confugeret, unum quemdam, cum videret presentissimum imminere periculum, quod moram longā & lenta auxilia non admitteret, varia cogitasse, si Nicolaum suum invocaret, incertum esse, an audiret, & forsitan aliorum votis audiendis & expediendis occupatum, non posse sibi tam citò vacare; aut si vellet, forsitan non admitti tam citò ad audientiam apud Deum, tandem igitur id, quod certius & tutius esset, constituisse, se rectè ad ipsum Deum per Christum confugere velle, cum Scriptum sit, Psal. 50. invoca me in die tribulationis, & ego eripiam te, & glorificabis me. Item, Ebr. 4. Accedamus ad Pontificem nostrum Christum, thronum gratiae, ut misericordiam consequamur, & gratiam inveniamus ad auxilium opportunum.*

SOLI DEO GLORIA.















